

EMBUKU E DUKUYA E MUSA NAJI

ENKITERUNOTO

1 ¹Ore apa te nkiterunoto, neitaa Enkai keper o enkop. ²Ore apa enkop nemeeta shoto^a, nemetii toki naa enaimin natii oriong o enguton, ore Enkiyang'et e Nkai nelo tioriong inkariak. ³Nejo Enkai; inchoo metijing'a ewang'an, nejing ewang'an. ⁴Nedol Enkai ajo ai sidai ewang'an. Nerishu Enkai ewang'an aitung'uaa enaimin. ⁵Neipot Enkai ewang'an ajo endama, neipot enaimin ajo enkewarie. Neaku eetae enteipa o entadekenya enkolong e dukuya.

⁶Nejo Enkai: "Inchoo metaa ketii o loing'ang'e erishata oo nkariak, naa

inchoo metirisha inkariak o nkariak." ⁷Neitayu Enkai oloing'ang'e nerish inkariak natii abori oloing'ang'e o nkariak natii shumata oloing'ang'e, neaku nejia. ⁸Neipot Enkai oloing'ang'e ajo Keper. Neaku teipa neaku tadekenya enkolong e are.

⁹Nejo Enkai: "Inchoo inkariak natii abori e keper eiturrurrokino pooki nebo, naa inchoo enkop natoyio eibalayu." Neaku nejia. ¹⁰Neipot Enkai enkop natoyio ajo Enkop, ore inkariak naaiturrurro tenebo neipot ajo inaaiposha. Nedol Enkai ajo aisidai. ¹¹Nejo Enkai: "Inchoo enkop metoiu inkaitubulu, inkaitubulu naaiu ilanterera, o

^a1.2 shoto: entoki nemeeta embata, aashu oriong o atua

1.3: 2 Ilkor 4.6 1.6-8: 2 Pet 3.5

lkeek loo lng'anayio ooiu ilantera too mpukunot enye te enkop." Neaku neiija. ¹²Neiu enkop inkaitubulu enyena, o nkaitubulu naaiu ilantera te risioroto oo mpukunot enye, o lkeek ooiu ilng'anayio too lantera lenye anaa empukunoto enye. Nedol Enkai ajo ai sidai. ¹³Metaa eetae enteipa neetae entadekenya enkolong e uni.

¹⁴Nejo Enkai "inchoo metaa keetae iwang'aritin to loing'ang'e le keper peyie erishu endama te nkewarie, neaku sii ilooitodolu ilmonek too nkatitin oo nkolong'i o larin. ¹⁵Inchoo sii metaa ketii iwang'aritin oloing'ang'e le keper peyie eisho ewang'an enkop." Neaku neiija. ¹⁶Neitayu Enkai iwang'aritin are sapuki, ore ina wang'an sapuk neitore endama, ore ewang'an kiti neitore enkwari. Neitayu sii ilakir. ¹⁷Nepik ninche oloing'ang'e le keper peyie eisho ewang'an enkop neitore endama o enkwari. ¹⁸Nerishu sii ewang'an tiatua enaimin, nedol Enkai ajo aisidai. ¹⁹Neaku teipa neaku tadekenya enkolong e ong'uan.

²⁰Nejo Enkai, "Inchoo metijing'a nkariak ntokitin naaishu, inchoo sii imotonyi meshomo to loing'ang'e le keper aangat enkop." ²¹Metaa eita Enkai ing'uesi sapuki oo naaposha o ntokitin naaishu pooki, o naaisperpiari naatii atua enaposha too mpukunot enye, o pooki motonyi terisioroto oo mpukunot enye, nedol Enkai ajo aisidai. ²²Nemayian Enkai ninche ejo, "Entoisho niponariri aaiput inkariak oo naaposha, naa nchoo sii imotonyi o loing'ang'e metubula te enkop." ²³Neaku teipa neaku tadekenya enkolong e imiet.

²⁴Nejo Enkai, "Inchoo enkop meyau ing'uesi naaishu te risioroto oo mpukunot enye; inkishu o ng'uesi naaisperpiari te nkop o ng'uesi e nkop te risioroto oo mpukunot enye." Neaku neiija. ²⁵Neitayu Enkai ing'uesi e nkop te risioroto oo mpukunot enye o nkishu te risioroto oo mpukunot enye, o pooki toki naisperpiari te nkop te risioroto empukunoto enye. Nedol Enkai ajo aisidai.

²⁶Nejo Enkai; "Emaitobira tung'ani te nkitanyaanyukoto ang onyaanyukie iyiook, nikincho ninche meitoria isinkir le naiposha, o motonyi oloing'ang'e, o nkishu, o enkop pooki o

pooki toki naisperpiari te nkop."²⁷Metaa eitayio Enkai oltung'ani te nkitanyaanyukoto enye makewan. Te nkitanyaanyukoto Enkai eitayio ninye ninche, oleo e eng'orui. ²⁸Nemayian Enkai ninche, nejoki "Entoisho entoponari emputa enkop nintore. Entoria sii isinkir le naiposha o motonyi o loing'ang'e, o pooki toki ake ninye naishu naiseseu te nkop." ²⁹Nejo Enkai: "Ng'ura, aashoo iyie pooki aitubului nau ilantera natii oriong enkop, o pooki shani oota ilantera too ilng'anayio lenyena intaa endaa. ³⁰O pooki ng'ues e nkop, o pooki motonyi o loing'ang'e, o pooki toki naisperpiari te nkop, o pooki toki naata enkiyang'et e nkishui aashoo enkaitubului pooki nanyori peyie intaa endaa." Neaku neiija. ³¹Nedol Enkai pooki toki naitobirua ajo aisidai katukul. Neaku teipa neaku tadekenya enkolong e ile.

2 ¹Metaa eidipaki keper o enkop o lorora pooki lenye. ²Ore te nkolong e naapishana eidipa Enkai ina siaai enye nataasa neeng'iyeng'a te nkolong e naapishana te siaai enye pooki nataasa. ³Metaa etamayiana Enkai enkolong e naapishana neitisiny, amu teina olong apa eeng'iyeng'e Enkai te siaai enye pooki nataasa enkitobirare.

Enkurma e Eden

⁴Kuna ninche iishoritin e keper o enkop ina kata pee eitobiri.

Ore te nkolong apa naitobirua Olaitoriani Enkai enkop o keper, ⁵eton meetae hoo ilkeek te nkop anaa nkaitubulu naabulu tióng'ota eton eitu eisho Olaitoriani enkop menoto enchan, nemeetae sii apa oltung'ani otur enkop. ⁶Kake enkinuku ake nadumunye te nkop aitashan oriong e nkop, pooki.

⁷Neitoki Olaitoriani Enkai aitobiru oltung'ani te nterit enkop. Nekutaki inkumeishin enyena entooma e nkishui, neaku oltung'ani oloota enkishui. ⁸Neun Olaitoriani Enkai enkurma, te Eden te nkalo oloosaen. Nepik ilo tung'ani oitobira atua. ⁹Neitubulu te nkop Olaitoriani Enkai ilkeek pooki oitiship inkonyek naa sidain sii te ndaa. Euno sii apa olchani le nkishui te mpolos enkurma. Netii sii olchani le eng'eno, oo supati, o ntorrok.

10 Eturuke sii olkeju oing'uaa Eden opik enkurma enkare. Neoro ilo keju teine aaku ilkejek oog'uan. ¹¹Ore enkarna olkeju le dukuya naa keji Pishon, naa ninye ilo oruko aman enkop pooki e Hafila, ine netii sahabu. ¹²Naa ore saabu aina kop aisidai. Etii isoito oimerle te sidano. ¹³Ore olkeju li are naa Gihon; naa ninye oshi oman enkop pooki e Kush. ¹⁴Ore olkeju li okuni naa Tigris, nerukokino enkalo oloosaen te Asiria. Ore olkeju liong'uan naa Frati.

¹⁵Neya Olaitoriani Enkai ilo tung'ani apik ninye enkurma e Eden pyeie etur neramat sii. ¹⁶Neitanap Olaitoriani Enkai oltung'ani ajoki, "Ore pooki shani otii atua enkurma indim ainosa, ¹⁷kake ore olchani le ng'eno oo supati o ntorrok minya ake, amu ore kenya enkolong ninya, meeta inchere pee miye." ¹⁸Nejo Olaitoriani Enkai, "Meishiaakino neton olea aa ninye ake, ekaitaiki enkaretoni naishaakino ninye." ¹⁹Metaa neitayu Olaitoriani Enkai pooki ng'ues e ong'ota o motonyi pooki oloing'ang'e neyau ninche enetii oltung'ani, pee edol eneiko teneisho ninche nkarn; naa ore enkarna ake ninye naba anaa enaishoo pooki toki neaku ina. ²⁰Neisho ilo tung'ani inkarn inki-shu pooki, o nena motonyi oloing'ange o pooki ng'ues e ong'ata; kake ore ilo tung'ani eitu etumi enkaretoni naishaakino ninye.

²¹Metaa etipika Olaitoriani Enkai injo naairoshi ilo tung'ani meirurayu. Ore eirura, neitayu olarasi obo lenye nenuk ine wueji too nkiri. ²²Ore ilo arasi oitayio Olaitoriani Enkai te ilo tung'ani neitaa enkitok, nerikoki ninye ilo tung'ani. ²³Nejo ilo tung'ani,

"Esipa ele taata oloito loo laik
laainei,

naa eoroti osesen lai.

Ekeipoti ninye aajo enkitok
amu eitayioki ninye tiatua olea."

²⁴metaa eorore olea menyee o ng'otonye, neibung'are enkitok enye neaku pokira are osesen obo.

²⁵Ore apa ilo tungani o enkitok enye meeta apa entoki naishopito nemedol enkurrana.

Engolon e tung'ani

3 ¹Ore apa olasurai naa aing'en oleng alang ing'uesi pooki naaitobira Olaitoriani Enkai. Neikilikuan ninye enkitok

ajoki, "Eji ketejo doi Enkai, 'Eminya pooki ng'anayio lo lchani otii ena kurma?'"

²Nejoki enkitok olasurai, "Aikiindim iyiook aainosa ilng'anayio pooki loo lkeek le nkurma, ³kake etejo Enkai, 'Eminya ilo ng'anayioi leilo shani otii empolos enkurma, nimishoroo hoo ninye arashu iyeye.'" ⁴Kake etiaka olasurai enkitok, "Miyeye ntae; ⁵amu eyiolo Enkai ajo ore tininosino ninye nebolo inkonyek inyi, nitiuuo anaa Enkai, niyiolouu isupati o ntorrok."

⁶Ore pyeie edol enkitok ilo shani ajo sidai te ndaa, naa olchani sii oitishap inkonyek, naa olchani sii ongurrayyu oiteng'en oltung'ani neitayu olng'anayioi lenyena neinos; neisho sii olpaysian lenye embata, neinos ninye. ⁷Ore inkonyek e pokira nebolo, neyiolou ina kata aajo meishopo. Nerip mbenek olng'aboli aitaak nkilani. ⁸Nening ninche oltoilo lo Laitoriani Enkai elo te nkurma eiropija enkolong. Ore olpaysian o enkitok enye neisudori pyeie medol Enkai tiatua ilkeek le nkurma. ⁹Kake eipoto Olaitoriani Enkai ilo tungani nejoki ninye: "Kaji itii iyie?" ¹⁰Neng'amaa ajoki, "Atoning'o oltoilo lino te nkurma, naureishoyu ama atoduaa ajo maishopo naipirri aisudori." ¹¹Nejoki Enkai, "Aing'ae likitiaaka minchopo? Inosa o lng'anayioi lo lchani laitanapa apa intae ajoki eminya?" ¹²Nejo ilo tung'ani, "Ore ina kitok apa nikinchoo metaa tenebo nanu, ninye naaishoo olng'anayioi lo lchani, mainosa."

¹³Ina pee ejoki Olaitoriani Enkai enkitok, "Kaa bae ena nitaasa?" Nejo enkitok, "Olasurai laateleja nanya."

Etudung'o Enkai enkiguana

¹⁴Nejoki Olaitoriani Enkai olasurai, "Ore amu itaasa ena, kitediaaki iyie aaitulus too nkishu pooki o ng'uesi pooki entim, keaku iserpepiari te nkop, naa enterit ninye endaa ino, too nkolong'i pooki e nkishui ino. ¹⁵Ekapik olomang'ati erishata ino o enkitok. Neijia sii etiu erishata e ishoi ino o eishoi enye. Ekepurd ninye elukunya ino, ore iyie niony entutunyo enye."

¹⁶Nejoki ninye enkitok, "Kaaponiki nanu emion te ishoi ino, te mion sapuk iuu inkera. Ore iyieunot inono pooki

keaku ino lpayian lino, neaku sii ninye likintore iyie.”

17 Nejoki ninye Adam, “Ore amu itoning’o oltoilo le nkitok ino, ninosa, ilo ng’anayioi lo lchani laaitanapa ajoki ‘Minya,’ etediaki enkop tenkaraki iyie, ekeaku enenkinyinyiret ake inya te nkishui ino pooki. ¹⁸ Kebulu ilkiku o ntulele te nkurma, neaku inya nena aitu-bulu oo nkurman. ¹⁹ Te nkinyinyiret inya endaa, ometaba anaa nirrinyokino enterit, amu teine apa kintobiruaki. Ira enterit naa enterit irrinyokino.”

20 Neisho ilo tung’ani enkitok enye enkarna ajo Hawa amu ninye ng’otonye oo looishu pooki. ²¹ Neitobiraki Olaitoriani Enkai Adam o enkitok enye nkilani oo ndapan, neishopoki ninche.

**Etaarayie Enkai Adam o Hawa
aitung’uaa enkurma e Eden**

22 Nejo Olaitoriani Enkai, “Ng’ura, etotiwuo oltung’ani anaa obo lang etayio lo isidain o ntorrok; ore tena kata, neidim ninye aitorioki enkaina enye olchani le nkishui ainosa, neishu ninye intarasi.” ²³ Metaa eitayio Olaitoriani Enkai ninye te nkurma e Eden peyie epuo aatur enkop apa naitobirunyeki ninche. ²⁴ Nearaa ninye ilo tung’ani. Ore te nkalo oloo saen e Eden, etipika ninye olmalaika, o lalem oyupuyup oman pooki alo peyie errip enkoitoi olchani le nkishui.

The Bible in Maasai
published as
BIBLIA SINYATI

Published by
The Bible Society of Kenya
PO Box 72983
NAIROBI
and
The Bible Society of Tanzania
PO Box 175
DODOMA

© United Bible Societies, 1991
Illustrations by Horace Knowles
© The British and Foreign Bible Society,
London, 1954, 1967, 1972.